

мр. Оксана Тимко Дітко

ІХ

МОЙО ТРИНАЦ “ДУМКИ”

На роботне место главного и одвического редактора “Новой думки” приятна сом 22. фебруара 1998. року. Пред тим сом пол рока робела як новинар у тим часопису. Функцию главного и одвического редактора окончила сом по 30. август 2001. року, значи неполни штири роки.

Кед сом почала робиц стретла сом ше зоз вецей файтами проблемох. З едного боку Думка длуго не выходзела порядне, читаче и можливи сотрудники не мали, лебо страцели звикнуце раховац зоз ню и чекац ю. Прето ми найвекши проблем бул знова звикнуц людзох на тот їх часопис, прешвечиц их же би го чекали и же би го сами пожадали пречитац. Тиж так мушела сом ше постарац позберац сотрудникох коло редакциї, пренайсец людзох котри би були заинтересовани писац до Думки, окреме писац без хонорару. Проблем бул у тим же ше структура людзох пременела од кеди Думка порядне выходзела, значи од войны.

З другого боку не було допущене же би ше хонорарно ангажовало людзох котри би робели на самим пририхтованю Думки, так же шицки работи коло планованя часопису, уношеня текстох до копютеру, лекторованя руских текстох, техничного ушорйованя окончила една особа - редактор.

И коло того шицкого за тоти неполни штири роки, дзекуюци моїм сотрудником, удало ми ше порихтац тринац Думки (од 103. по 115. число), и седем Венчики (од 20. по 26. число).

Старала сом ше же би Думка, з оглядом же є часопис Союзу Русиных и Украинцох, виражовала и його становиска и напрямки, значи же би не була лем часопис едного, лебо даскелїх валалох, але же би у ней було цо вецей теми зоз работи Союзу, наших дружтвох, контакти и вязи зоз другима, блізкими организациями. У тих тринац числох вишло коло дзешец интервью зоз людзми важнима у култури нашей национальной меншини. Сам факт же у пририхтованю шицких тих числох участвовало вецей як пейдзешат сотрудникох, од котрих и по нешка векшина не достала хонорар, шведочи же людзом Думка потребна и порихтани су участвовац у ей пририхтованю.

Зоз Венчику сом ше намагала направиц правдиви дзедински часопис котри би помогнул и нашим дзецом и учительком, у тих даскельох школах дзе ше руски и украински язык виучую. Думам же найвреднейши дзедински часопис гевтот у котрим дзеци пишу вецей як половку змисту. Теди то справди и гевто цо вони сцу пречитац. З оглядом же ище ест бриги зоз учебниками старала сом ше и цо лепше повязац ше зоз учительками намагаючи ше же би вони сами предкладали тексти котри би познейше могли вихасновац и у настави. Думам же ше “Венчик” вшелїяк муши отрмац, и же треба шицко зробиц же би вон и на далей остал часопис наших дзецох праве прето же шицки вони у будучносци читателе “Новой думки”.


Тиж так Редакция видала и кнїжку “Поезия и проза Русиных и Украинцох Республики Горватскей”, а участвовала и у издаваню збирки поезиї Любки Будински-Фалц “Класки”. З оглядом же после 30 рокох иснованя Союзу то перша антология и перша оригинална авторска кнїжка у виданю нашего Союзу, думам же то вельке доприношене.

Мило ми же сом була редакторка “Новей думки“ у чаше вельких пременкох. У тот час перши раз после войны отримана виберанкова скупштина у Вуковаре, Союз купел будинок у Вуковаре, Союз и Редакция “Новей думки“ ше врацели до Вуковару, почали пририхтованя за вибудов Културного центру Союзу Русиных и Украинцох у Вуковаре, означена 30. рочница Союзу, и “Новей думки“, отримани манифестациі з нагоди 150 рокох приселеня Русиных до Миклошевцох, 170 роки до Петровцох и 100 рокох приселеня Украинцох до Горватскей..

Вшеліяк як и у каждой роботы було гришки, але думам же сам факт о успоставяню континуитету виходзеня, о збераню людзох вельо важнейши.

Наздавам ше же будуци редактор на тим плану посцигне лепши резултати.





Делегачії Союзу Русинок и Українок Републики Горватскеї и Союзу Русинок и Українок Югославії на стретнуцу и розгварки у Свидніку у Словацкеї 2000. року